

Pangasinan - Liligliwa Masanton Sulat - Comfort Scriptures

2 Corinto 1:2-4 Itdan kayo komun na Dios ya Ama tayo tan say Katawan tayon Jesu-Cristo na bindision tan kareenan. 3 Igalang tayoy Dios tan Ama na Katawan tayon Jesu-Cristo, say mapangasin Ama tan Dios a panlalapway amin a ligliwa! 4 Liligliwaen to itayo ed amin a kairapan tayo, pian makatulong ti met ed saray arum a walad antokaman a kairapan diad panamegley na ligliwan inawat tayod sikato.

Probirbio 15:13 No maliket iray totoo onimis ira, balet no maermen ira ombilonget so lupa ra.

1 Arari 8:66 Diad kumawalon agew, pinasempet la nen Solomon iray totoo. Inggalang na amin a totoo si Ari Solomon tan sinmempet iran maliket lapud amin a bindision ya inter na Katawan ed aripen ton David tan saray totoo ton Israelita.

1 Awaran 16:10 Manggayaga kayo, ta kayaryan to itayo; manliket komun ya amin iray mangigagalang ed Katawan!

Probirbio 12:25 Say kapagaan napaandi toy liket mo, balet saray marakep a salita paliketen da ka.

Probirbio 13:12 Say ilalon mabayag ya aalagden pakakapoyen toy liknaan, balet say pilalek ya agamuran pagagayagaen to ka.

Isaias 30:26 Say bulan magmaliw a maliawan singa agew, tan say agew magmaliw a mamimpitoy kinaliwawa to, a singa kinaliaway pitoran agew a nankakasakey. Nagawa ra yan amin no berberen tan paabigen na Katawan iray sinusugat tod saray totoo to.

Oseas 13:8 Dogpaan ta kayo a singa sakey ya uson imbatik da ray anak to, tan wabwaben ko ray pagew yo. Singa ak lion a buagen ta kayod kawalaan yo, tan singa ak ayep ed katakelan a mamingbingkas ed sikayo.

1 Samuel 1:8-10 Tepeten ed satan nen Elcana ya asawa to, Ana, akin et onaakis ka? Akin et ag ka mangan? Ag ka la kari maneermen. Ag mo ak ta pinabli nen saray samploran anak a lalaki? 9/10 Amisan diad Silo, kayari ran angan ed loob na abung na Katawan, inmalagey si Ana. Maerermen si Ana tan mannangnangis na ampaitpait legan ton mampipikasid Katawan. Diad sayan bekta manyodyurong ed abay na puipta si Eli a pari.

Salmo 25:16,17 Lingaw mo ak pa, Katawan, tan kasian mo ak, ta maermen tan nanairapan ak. 17 Ekal mo pa ray pagpagak, tan agwat mo ak ed saray gunigon ko.

Salmo 34:18 Say Katawan maasinger ed saray nanaekalay biskeg na linawa; ilalaban to ray sigput a naandiay ilalo.

Salmo 38:8 Makapkapoy ak tan agaylay kesaw ko; nagugunigon ak tan manay-ay ak lad sakit.

Salmo 55:4 Mapalaloy takot ko, tan say takot ed patey dedetdetan to ak.

Salmo 61:2,3 Diad inkaekalan koy ilalo nen arawi ak ed abung ko, ontatawag ak ed sika! Iyakar mo ak pad salimbengan ya arawid kaatapan, 3 ta sikay manangyagel ko, say mabiskeg a mangilaban ed siak ed saray kalaban ko.

Salmo 62:8 Sikayon toook, manmatalek kayod Dios diad amin a panaon.

Ibaga yod sikatoy amin a gunigon yo, ta sikatoy salimbeng tayo.

Salmo 73:26 Nayarin onkapoy so kanunotan tan laman ko, balet say Dios so biskeg ko; sikato labat so nakaukolan ko.

Salmo 77:2,3 Mampikasi ak ed Katawan, no nagugunigon ak; sanlabin itatagey ko ray limak diad pampipikasik, balet ag ak naliligliwa. 3 No nunoten koy Dios, mandageyem ak; no mandalepdep ak, onkakapoy so linawak.

Salmo 86:11 Katawan, ibangat mo ak pad labay mon gawaen ko, et matoor ta kan onuren; ibangat mo ak pan manlingkur ed sika diad intiron pusok.

Salmo 109:22 Mairap so bilay ko tan wala ak ed pankaukolan, asugat ya anggad dalem so pusok.

Salmo 112:7,8 Ag antakot a makadngel na maoges a balita; mabiskeg so pananisia to, tan manmamatalek ed Katawan. 8 Mabiskeg so linawa to tan ag natatakot; ag to panduaruwani a nanengneng ton natalo iray kalaban to.

Salmo 143:4 Kanyan nanaekalan ak lay ilalo; mapalaloy paneermen ko.

Salmo 147:3 Papaabigen to ray nanaekalay biskeg na linawa tan beberberen to ray sugat da.

Probirbio 14:30 Say mareen a kanunotan pagmamaliwen ton mabiskeg so laman, balet singa kanser so imon.

Ecclesiastes 1:13 Ginetmak a sukiten tan aralen ya amin iray nagagawa diad tapew na dalin. Say Dios impasen to itayod makapasinagem a kipapasen.

Ecclesiastes 2:10 Nalak ya amin iray labalabay ko. Ag kon balut sinibletan so laman ko ed antokaman a liket. Inkinon kon amin iray kinimeyan ko, tan tumang ko ra yan amin.

Ecclesiastes 2:22,23 Mankikimey tan mapagpaga ka legay bilay mo, et antoy nagunggonam? 23 Amin a gawaen mo, legay pambilay mo, kapagaan tan sakit na olo so iter da. Anggan diad labi ag mandeen so kanunotan mo. Sakey met yan andikakanaan.

Ecclesiastes 11:10 Ag yo aabuloyan a gunigonen kayo na antokaman odino panliknaen to kayoy kairapan, ta aliwan mabayag so kiwala yo ed kalangweran.

Isaias 30:29 Balet sikayo ran totoo na Dios, manliket tan mankanta kayo a singa gagawaen yo no labi no masanton pista. Manliket kayon singa saray manaakar legan a totogtogen iray plauta diad pamapaarap dad Timplo na Katawan a manangyagel na Israel.

Isaias 57:15 Siak so atagey tan masanton Dios a mambibilay ed ando lan ando. Manaayam ak ed atagey tan masanton pasen, balet manaayaman ak

met ed kawalaan da ray mapaabeba tan magbabawin totoo, pian nipawil koy biskeg na linawa ra tan say ilalo ra.

Isaias 65:14 Mankanta rad liket, balet manakis kayo lapud sakit na pagew.

Isaias 66:13,14 Ligliwaen ta kayod Jerusalem, a singa sakey ya inan liligliwaen toy anak to. 14 Manggayaga kayo naani no nanengneng yo yan nagawa; pabiskegen to kayo tan paabigen toy laman yo. Naamtaan yod satan a siak, say Katawan, tutulongan ko ray mangoonur ed siak, tan idapok so pasnuk kod saray kalaban ko.

Jeremias 15:16 Nansalita kad siak et dinengel koy amin ya imbagam.

Kayaryan mo ak, Katawan a Dios a Makapanyarin-amin, kanyan saray salitam pinano ray pusok na gayaga tan liket.

Jeremias 24:7 Itdan ko ra na pilalek a mangamta a siak so Katawan. Diad satan magmaliw iran toook tan siak so Dios da, lapud ompawil irad siak diad intiron puso ra.

Juan 14:1 Inkuanan Jesus, "Ag komun nagunigon so puso yo; manisia kayod Dios tan manisia kayo met ed siak.

Juan 14:27 "Itlak kod sikayoy kareenan; say kareenan kon dili so iter kod sikayo. Aliwan singa panangiter na sankamundoan so pangiter kod sikayo. Ag komun nagunigon tan ontakot so puso yo.

Juan 16:6 Natan ta imbagak ira yad sikayo, mapalaloy ermen na puso yo.

Juan 16:22 Ontan kayo met: maermen kayo natan, balet nanengneng ta kayo lamet, et napanoy liket so puso yo, liket ya anggapon balut so toon makaekal.

Gawgawa 2:46 Inagew-agew iran nantitipon ed Timplo, nampipisag iray tinapay ed saray abung da, tan nandorongo ran maliket tan mapaabeba so puso ra.

Roma 9:2 Agaylay ermen ko, tan agaylay ag itonday sakit na pagew ko, lapud saray agagik, saray kadalaan tan kabaleyean ko.

2 Corinto 2:4 Baleg so pagak tan ermen ko nen sinulat ta kayo. Managagos so luak nen gagawaen ko man a sulat. Sinulat ta kayo ya aliwan say pamaermen kod sikayo, no ag say pangipaaamtak no panoy kabaleg na panangarok ed sikayo.

Efeso 5:19 Mantotongtong kayod panamegley na saray salmo, imno, tan diniriyos a kanta. Kantaan yoy imno tan salmo so Katawan, tan impapusoy pangigalang yod sikato.